

SANTIACUBAY CATERA

Samuchueda

1 ¹Ray, Santiyácu, Jüdenu muchechiy, Vuyntyityu Jesucristu muchechintyi, ramyuchuvay rıchanayadamu jirye, jiryatıy sürema Jüdenu mucadiva jirye, judıfyüveda jiryenámıy tıtaju.

Vuryajachıny parucharıñube vuy

²Ratyeryıveda, jiryantya jachıpyajasarara jchanayada jaryi, ranumatıy sarye vacha jatachoda jirye.

³Datyışamıtya daryaju jirye nıtyuramusıy rajantyanumayara vıtyuvachoda simu Jesús. Vuyyanıtya varıy rajısvıvyu, jatachodajısıy.

⁴Vuryantya datya tapımusıy jachınyadara jatachoda, vuryatıdye vıcha jamıy varıy, samıjyeñuma vıñıcha, jıratımyu ne vuryasıtye, mıtya.

⁵Tıtıy sıtye jıryequebyımusıy datyadara, (jatachodajısıy vanıtyada), samajachiñuy janısa siva Jüdenura, nıtıy sachara tıtaju nijyanvıjyura, tamajubarya sanıcha, dantıyamuy ne sajantaniñi nıtıy jachiñurya. ⁶Samajachiñuy sıtenu jachıpyajadada, ne sajanumıtyaja varırya jıjechıpyajada, tapı janumıtyajajada jachıpyajadati, nıtyu rıyerya sanumıtyajara. ⁷⁻⁸Ne sajachıpya jımyajada tara varıy Vuyntyıtyumısy, tapı savıchasara janumıtyajajada jachıpyajadacanu daryaju, ne vanay sajachıpya sıtenu.

⁹Vıtyeryı jantıyuanı jıta rajchanachara varıy jıryatıy Jüdenu nubesityanıy daryajunı. ¹⁰Daryantıy saıjchanatıyasara taratıy, Jüdenu jantıyutya daryajunı. Ne saıjıryıy jaryı taratıra, nıtyu sısabıtya surıy tarıjıy. ¹¹Rıtanumatıy vınyadá ranıy, rarıdyeje sısabi varıy, rajıvyu varıy rabi, racaramya raratyeda varıy. Daryamusıy rarıdye sataryıtyıasara yımusıy jaryı taratı.

¹²Chanatıysı jıtanı nıtıy jachıny jatachodajıy, jantıyınuma daryaju dañı, sasay Jüdenu parenu varıñı, junareju jınyajıy sasañı. Sıteda Jüdenu daryaju yasañı nıtıy vatani. ¹³Ne tı rajtay jatachodanubera: “Satachurıy Jüdenu varırye,” tapı dantıyamuy ne tı vanay rajatachunı, dantıyamuy ne saıjatachu tı varıntyıdye. ¹⁴Jıñu vanu jatachusınuma sanıryıyadamudayu.

¹⁵Rapıruñumatıy sanıryıyada varıy, rınday jıta juuchueda varıy, varıñumatıy rajıvye juuchueda varıy saıy, sadııtyanuma varıdyerya.

¹⁶Ne jıryaqıvıychutanıy, ratyeryıveda vatasavay daryaju jırye. ¹⁷Rımusa jıta tıtaju mıtya sayada samırya, tıtaju jıryatıy mıtya sacharara. Rımusa navachıy, Vuryındenumısy, jıryatıy nonojamı daryaju dañı. Ne sanumıtya Jüdenura jıjechıpyajada tajiñechoju, mıtya. ¹⁸Sadırya jachıpyajadamısy yınejada sıtenu jıñıquejadada vuy, vıvyıcha jıta varıy

samivye sajú, nūtyu rajottedamusiy ramityanivye sūndevay cabyimusiy.

Sítenu samirya vicháda Jūdenu diya

¹⁹Jiryajnyū rañēcho, ratyeryiveda vatasavay, daryanī vuryecha varenuntidye, vuryatidye tuvāchu varirya; ne vuryajaryuvurya niquejada, dantyamuy ne niqueyada risajū. ²⁰Vuñiqueyadamu jiryinuy, ne vuryitotani daryajura jiryatiy samirya Jūdenu diyara. ²¹Ramunītiy jiryaparuy riva taji niquejada, taji vicháda jarye risajū, jiryajmutya variy siityejada jachitya-varya Jūdenu niquejada, jiryatiy nutasaranuma jiryejechimyudarya, jiryatidye ramitya rata.

²²Jiryēcha Jūdenu niquejada jtōtanivye, ne jiryāquivūchu yimusiyu, jiryatiy jiryetyuvāchu mitya ranācho. ²³⁻²⁴Tiqui vanutiy tuvāchu yitōtanīsadamura Jūdenu niquejada, savicha variy nūtyu vanu jiryatiy sunūñi yintu nuvatumu. Sunuy jítayu, saya variy, vanira sajachipuy varirya nūtyu vanura rañichasiy. ²⁵Nini jita jiryatiy sunuy samirya ranācho Jūdenu niquejada, jiryatiy raratyānu juuchuvejaisivuy, ne saparuryuy riva ranācho jnyūyada. Jiryatimuy ne sajachipurya Jūdenu niquejada, satuvāchusara variy ramu, nini jita radatyara Jūdenu jmutyada variy yivaayadamu.

²⁶Nītiy jachipiya: Ravyicha Jūdenunijyu jachipiyajada jachi, netimuy ne sani datyara jidyechiy sabodeda, mitya saquivūchu yimusiyu, ramācho mitya variy sajū Jūdenunijyu jachipiyajada.

²⁷Ranī jita sítenu Jūdenunijyu jachipiyajada day, jiryatimuy ne tara tárara, vuryatidye jañuyā simu bachetadi, bachenodamu jarye, vuryatidye jmutya taranijyu variñada, ratiy nanuvata, jadchintiy vuryatidye jnyū vācha vichādajisiy vuryeyadaju.

Ne vuryajaryeta tī nijyanvay cabyimusiy

2 ¹Ratyeryiveda, jiryatiy vūtyuvāchu simu Jesucrīstu vandamu, ne vuryajaryetasaranī tī nijyamī Jūdenu siityarijadamujū, ne vinu jiryatiy savicha jaryi taratī, dantyamuy ne vuryarrachunī jiryatiy jantyuyaninī. ²⁻⁴Dañuma saryi jay vūntyeryanijyovimu tiqui vanu samijetyi, órutera janajatutī risajunī, nūntiy dañuma sajay t̄arijepyota, jantyuyani, varityi vūjeryetani samijetyi vuryatidye jtay siva: “Yajay, yamāsa samirya māsjoncha”; nū jita, jantyuyani, vūryi jtay dyetya siva: “Jasiy yaraniy,” varimyata vūryi jtay siva: “Mitya yamāsa mucomu,” vūjeryeta varivuy, nūtyichitya vuryecharuy variy samivye. Vuñicha variy taji jachipiyajadatavay.

⁵Jiryātuvāchu rañēcho, ratyeryiveda vatasavay. ¿Ne jiryedyetarūdye jiryatiy sajaryetada Jūdenu ri y jantyuyadavay riryatidye vichaniy sítenu tuvāchuvay variryi, riryatidye jmutya varirya jiyarurya sansujyomu rusa t̄itaju jiryatiy savatavadyeryi? ⁶Jirye jita javiryutya daryi jantyuyadavadye. Jiryitañiviy taratinī ramutiy sivaatyanī mitya jirye, satiichiy simujū cadnadu variy jirye. ⁷Jaryi taratī jita javityiyerya Jūdenu jtya ramutiy jiryityuy varidye.

⁸Vūtyi jtōtaniy jítara Vūntyityu niquejada, darya nūchara nīday:

“Vuryantya vatani vūryeryenu nijyamī nūtyu vūvyata daryantivuy,”

vuryivaay samirya variy.

⁹Vūtyi jaryeta tī, vūjyuuchuvay variy, Jūdenu niquejada jtay darya. ¹⁰Ne jiryinuy, nītiy ne jtōtaniy t̄itajura Jūdenu niquejada, sajiasay variy ratayu. ¹¹Tapi nītiy niquejada:

“Ne yarupi tī vaturūjsa ji,” saniquejadantiy:

“Ne yajvay risaju ti.”
 Dañumamuy ne vuryupi ti vaturujsa,
 vuryityi jvay ti, vuryarupanu varirya
 Jüdenü niquejada. ¹²Ramunیتی
 vuryanique samirya, vuryecha samivye
 variy, ramutiy sasaranu Jüdenü variy
 jiñiquejadata vuy, jiryatıy raratyānu
 juuchuvədəjisıvyuy. ¹³Nıtımyu ne
 jantyutya ti, Jüdenü rāchanıy
 santıyutyıśadamu taray. Jantyutyada
 jıta jaryınra ramusiy tuchutada
 murıchenutadedā.

**Vuryadıtıyanura vıtyuvachoda
 vıvyıchadedamu**

¹⁴Ratyeryıveda, ĩTara vuryıryı rata
 jıryatıy vuñi jtay sıtenu
 jachıpyavavyuy, ne vuryıvaay nta tara
 ramusiy? ĩRanıvyıy jantyutya vinu
 vıjechıpyıjajada vuy? ¹⁵⁻¹⁶Saryıtyı
 rupıñeyā sıdyavı tıquı vıtyeryı,
 varımyata vuryıtyamutu, ne jmyıcharatı
 daryajunı, vuryıtatyı variy sıva: “Yejiya
 jıdyırya samıryamu, yavanonu
 sujajyuuta ji, yapotyānyı jıta varıntyı ji”
 tamā vuñi say taranı, tamā, tamā
 samırya ranıcha daryamusiy. ¹⁷Netımyu
 ne vuryıvaay samıryara vıjechıpyıjajada
 sıtenu, rarupanumā varıdyerya sıtenu
 vıtyuvachoda day.

¹⁸Tıni dyetya jtadye: “Jı sıtenu
 tuvachura, ray jıta jvaay sıtenu samıy.
 Yadıtıyanu sıtenu jıjechıpyıjajada
 yıvaayadasā racyu, samıryavıdye
 ranıcha, ray jıta radıtıyanu rıvaayada-
 musiy jırya sıtenu rajechıpyıjajada.”
¹⁹Jıjechıpyıya dyetya: “Vınu tıquı
 savıchasara Jüdenü.” Jıvyıchānyı
 samırya jıryatıy tuvachura ji. Bayantu-
 veda jarye tuvachu simu Jüdenü,
 samuchutye variy jıchuvıyadamu. ²⁰Ne
 jıdyetyaruy jıdyetyıśadamu, tamā
 samırya ranıcha tuvachoda, tamā,
 netımyu ne vuryıvaay samıy risajıra
 tara. ²¹Daryatıy vumıyunatıyı Avurābay

jnutatyadani jıdyenu Isácubay sıva
 Jüdenü, sıtedamu, Jüdenü diyada variy
 sııtyeera sıva. ²²Ne jıryınyuy,
 satuvachoda jmutıyada sıvaayadajıyuy,
 daryamusiy jıta sıvaayadamusiy
 yıtotanırya jıtyuvachoda simu Jüdenü.
²³Daryamusiy ritotadedā Jüdenü
 nıquejada jıryatıy sıvaañıyada
 Avurābarya, darya jtachara:

“Satuvachoda Avurābay simu
 Jüdenü, sumutyajada varıñı,
 jıryatıy vase vıchara sıdıya
 daryajunı, Jüdenü jtada variy
 jıjemyıcyunı.”

²⁴ĩJıryeñı jnımyavıy? Sumutyasara
 Jüdenunı vanu nıtyu vase jvaarya, ne
 vinu satuvachodamu, netıy vinu
 sıvaayadıva jarye. ²⁵Darya
 nanuvıchānyada tarıy cadnatoda
 Raábıjıyuy jtyatanıbe, sumutyajada
 Jüdenü nadıvaayadamusıy, jıryatıy
 nanımutıyajada jıryorımyu nada
 jpasanujıyuy, jnyıasanujıyuy daryaju
 nada, nanıpajada jıta vanırade jadchıy
 tanıva nada, sañuma jıryı jıryı nada,
 ramunıtyı nanıpajada tanıva nada.
²⁶Nıtıtyı jtay yıtıyadamu jıtyuvachu simu
 Jüdenü ĩva taraju ranıcha cay?
 Nıtyunuma savı ranıcha jnutısa.

**Vuryantıya jnıtya vacha
 nıquejadajısvıyuy**

3 ¹Ratyeryıveda, ne samırya nta
 vuryıtye rajuumusiy datıyanıjıy vuy,
 tapi varıtyı sasıtye datıyanı rıva
 yıvaayada, savıchānyı Jüdenü jaryınra
 variy rıvanı. ²Tapi tıta jıryınyuy
 vıchıtıye japıchıy samırya jvaayadajısvıy.
 Nıtıtyı ne sıtye rajısvıy samırya nıquejada,
 nıñı jıta rācha samıjıyé, sadatya bayada
 samırya jıvyu tıtajıy risajıntıy. ³Rıbe
 sajıva cavañura sırııtya sıasıtyejadajıy,
 ratanı rıchıquıtyatınyı tıtajıy varırya
 savı. ⁴Vapuruntıy, dañuma rācha
 jamıjnu vapuru, rajatıyaruy rııcho

varidyerya, sani siquityataniya ratatira ratimyu dera varidye, vase jiyadaju rumutiy sayaruy. ⁵Daryaday ravicha vudychiy pasidyentiy, taraqui niquejadamusiy rarichata rajuurá. Jiryinuy pasidyeramusiy ranuyasumiy jiiday. ⁶Daryaday varintyirya vudychintiy, rivaay varirya vacha jaryedo. Rarupanura vuvyu titaju varintiy. Nutyu jiiday rurera vacha vichada titaju vuvyichasadamu, nutyu jiidatyo nuyajadamusiy radachimyuya jiidatye vudychimiyuju daryaju. ⁷Vanu jita rajutyunanu jmyirya, nipyati, codiy jarye, jajare vichi jaryentiy, sajutyunuma nijyami jasiñi. ⁸Vudychiy jita ne ti jutyadodasara day, jaryi nicyaray daryajura, diichara dyetya ravicha varyi. ⁹Vudychitya jita vuryitay samirya sanijyu Vujye Judenu, ratantiy vuryavityeyeni nijyamintiy, jiryatiy Judenu jantyasi judesi dañi. ¹⁰Vuryitosiy rasipyata samirya niquejada, nicyaray niquejada risajuntiy. Ratyeryiveda, ne samirya raryicha darya. ¹¹¿Va rasipyatavya ja saboja, jivyaja jarye tajuquvimusique? ¹²Rajo ne jay nutyu puriy japitu darya, dantyamuy ne rajay samusiy nutyu rajo. Dantyamuy ne rasay jivyajara saboja.

Sitenu datyada

¹³¿Chira vichasara mityamusiy datyara jiryeebyimu, chi? nitiy datya vase ramuju. Santya dityanu jivyichasadamura yivaayada samirya; santya dityanu samirya jachityira sitenu jidyetyada.

¹⁴Varityi ravicha ratyada jiryechimiyu, jiryatiy jivyara darya, varityi jiryechipiya vinu jinijyuntiy, ne jiryajchanatya varyi jidyetyadamuy, ne jiryinuy jiquivuchu rayaraju sitenu varyi. ¹⁵Ne rajujuje darya datyada navachiy. Jiryá mucadimusidyerya,

vinu vujiruyada jachipiyajada darya, jiryatiy bayantu nutyityumusirya.

¹⁶Jasityirya jnuvayada, jasiy sajachipiya vanu varyi yimusiy, jadchifuma runday titaju vacha jachipiyajada varyi, vacha vichada jarye, sarupanuma samiy varidyerya. ¹⁷Navamyusiy datyada jita, sitenu samirya vichasaraju, jiryatiy rantyityura datyada darya. Jachintiy, darya datyadamusiy vuryecha juvara vichavay, samirya jachityavay jarye, siityevay risaju, jantyutyadatavay daryaju vuy. Vuvyicha samirya jvaavye varintiy, ne siquityadaju jachipiyavay, ne vuryaniquenumayara quivuyada.

¹⁸Vuryityi nutara tara, vuryajato varintyirya. Vuryityi jatorurya samirya vichasada Judenu diya, vuryantya nuta varirya ratadintiy samirya vichadaju. Jiryatiy vuryidutya varirya vacha niquejada, vuvyatatya jiryinurya vacha niquejada day.

Vuryantya tuvachu samirya jachipiyajadata simu Judenu

4 ¹¿Tesi runday niquetyada jiryimu, tesiy? juveda jarye. ¿Neviy jiryeniruyadamusiy jiryatiy ravuunuruy nicyaray jvaayadamuju jiryey?

²Jiryevyatatirya tara, ne jiryedyiryuy riva; jiryivay, ne samirya nta jiryevyicha varyi, ne vanay nta jiryedyi varyi riva; jiryivatyyi, jiryeyotara niqueyada daryaju, nutyichitya jiryadiy riva ratiy jiryevyata, jiryatimuy ne jiryechiñuy siva Vuryindenura. ³Jiryetyi vata siva Judenura, ne jiryimutyara, vachamusiy jiryechiñuy siva daryajura, jiryatidye patya jiniruyadamu varintyirya.

⁴Jiryinuyada ramiy daryajuni Vuryindenu. Ne jiryedyetyaruy, nitiy jutya daryaju rusa rityimuy ne Judenumu tuvachuvadye, ramuni savicha Judenu mityasiy varyi. Ramuniday nitiy vicharuy rijemyicyu jiryatimuy ne Judenu

siityariyadyeryi, savicha Jüdenü mityasiy variy. ⁵Jiryechipiya dyetya mitya rutay Jüdenü niquejada nüchara:

“Ratýadamusiy jita savata Jüdenü Jnutu jaryivyuy. Jüdenü vichataniy daryaju vuryivani, vuryinuyadaju.”

⁶Sasay jita jaryivyaju vurya jivyanuyada, vuryatidye rupi variy vinu sisa. Ramunıtiy rıtay nücharamu:

“Sayaronu Jüdenüni yinnuvañu, sasay jita yimutyadani jiryatimyu ne yinnuvañudañi.”

⁷Ramunı vuryasiitye saju Jüdenü. Vuryavanıtya rajisiy bayantu jatachoda vuy, sabay variy vumyomusiy.

⁸Vuryatuudiñi Jüdenü, satidye tuudi varintidyevyuy. Jiryapuy riva jiyjomutu vacha jvaayadajisiy, juuchataway; jiryavasenura jijechiy, jiryatiy rajachipiya rajuura vacha tajijyu.

⁹Jiryantya nuvey, jiryajnay, jiryeyuuchaveda jiyasayadamu day yinadye. Jiryajanumityara jityodiyada, jiryichanayada jarye, jiryinayadaju, jiryeyivedaju jarye. ¹⁰Jiryajada Jüdenü nachoju jiyuuchavediva variy, sandyetyate nubesityanite jiryentyi.

¹¹Ratyeryiveda, ne jiryanique vacha nuñi jiryenıjyu tara. Nıtiy niquera mitya quivuyada, satuchutaniy jityeryi variy, nıni nique taji ramu Jüdenü niquejada, satuchuta tajirya saniquejada variy. Vıtyi nique tajirya saniquejada, vıpyarumya ramusiy riva siitejada, vıtyuchu variy rayaroju saniquejada.

¹²Jasiñi tıqui, nıtiy say niquejada nuı, nıni jita datya samiryavidye ranıcha saniquejada. Nıday raray nijyamı jiyada, nıday raparantıñi. ¿Va jiique, chıra dajyi, chí? ¿Nıtyuramu yıtay sachaniy Vıjye tajiñi jityuunu vichi, nıtyuramu?

Ne vıdyetya nıtyura racha tarimysiy

¹³⁻¹⁴“Tarimysiy rajiya tajijyu, varimiyata tanıjyaquisaraju, jasityi

rataryurya juvaadyi, ramurichiryatiy racanay.” Jachú jita, ne vuryanique jita daryá, vıdyetyaviy, tarıjyuvıdye sajnıtyaniy Vıjyevyuy, vuryaniquejay darya. Ne vıdyetya tarıjyuvıdye racha vuryinuyada, temusiy taraquıjuni dyetya racha, temusiy tarıpyumusiy racaray vuryinuyada nıtyu rajırujryanube. ¹⁵Temusiy dyetya vıryi jıtya: “Jüdenü vatadamu dyetya vıryi jıny, vıryi jvaay jita tara variy.”

¹⁶Jiryatiy yıtay jaryi yinnuvañu daryaju ji, yichanıtya varıntyı ji. Yinnuvañu daryaju ji, ramunıtiy jamırya vıchara ji. ¹⁷Ramunıday, nıtiy datyara samırya jvaayada, jıryatiy ne sıvaay variy samırya, saju nıdyerya juuchaveda varıdye.

Santya tuvachu jaryi tarati

5 ¹Jiryajnay jita, taratavay, jıryechipiya daryaju rajıju yentyuyada. ²Rapumya daryaju jıryeberya, sımyiñuma rajamı sıjayu. ³Radacumya jıryecyurıquıy, ruunadye, pupaday jarye risaju, radacuyada ratıchuta jıryeyaroju, rarupay jıryevyuy rıcosıntyı, nıtyu jııday jıryebe yajıju daryaju tamıtya rundamıjura. ⁴Rasañeya jita jıryecyurıquıy vıjyomıjache jıyaraju, jıryatiy jıryıbayada murıchedoda rata rıy jvaavye, jıryatiy ruvaañıyada jıryeñudımyu. Nuñi rıy jıtyuchunu jvaavyedyeyu, ruvaayadıva: “Tamá sani murıchenu samıvyuy, tamá.” Satuvachuma Vuryındenura rıtyuchoda, mıtyamusıy sadatya varıdyerya.

⁵Jıryıchanıtyamara vacha vıchada, taji nta vıchada jarye, ramıtiy jıryepıtyara jıcyurıquıy variy, ramıtiy jıryepıtyaniy samıy juvedajıjıyuy.

⁶Jıryetyuchutajayajadani nijyamı samırya vıchara, jıryemyudoda varıntyıñi, ne vanay satutadeda variy jırye.

Tapimusiý vicháda

⁷Jiryajachiniy tapimusiýu, ratyeryiveda, Vuyntyityujijy jiryajachiniyu. Nutyu darya sajachiniy nudiy jvaañu rajiju rumurayu, ratidye jovay nutasara variy. ⁸Jiryantya jachiniy tapimusiý sajijuntiyu, ratuudiyánuma jiryinurya sitijada Vuyntyityu. Ramuni jiryasurutyaniyrya jijechiy sajiju. ⁹Ne samiryá tuchutáda nuñi taryiveda vuy, sañuma tuchuta Jüdenü varintyidyevyuy, jativyenuma jiryinuñi nñtiy rachaniy tara vuy. ¹⁰Ratyeryiveda, jiryajantya raniy Jüdenuju tuchuvay jachideda, jiryatiy rijecheda jipyarutyadanubeyu, ne ripyaruryuyada riva Jüdenuju tuchoda varidye, dañuma ranicháda parucharimusiý.

¹¹Vuryitachara jchanavyeryi, jiryatiy rivyichasara tapimusiý jachinivye daryaju. Jiryeni tuvachumara Jóubabay jachideda, jiryeni dimya riva jiryatiy sasayada Jüdenü rucosiñi. Tapi savichasara Jüdenü samiryá jachityi, jantyutyara jarye risajuni.

¹²Jiryatuvachuvaju rimu, ratyeryiveda, ne jiryatuchu sitenuvaju Jüdenü jtyamura, netimyü vinu jarichunijyu, dantyamyü ne mucadinijyu, ne vinu taranijyu, mitya. Jiryatiy jtay daryaniviy, mityani jiryanique daryatiy jiryaniquey, daryaday ranicha jiryeniquejadantiy. Ne ti ratuchutaruy variy jiryé.

Jüdenüjsá tuchodivasiy vuryadiy riva sivaayada

¹³Titiy jiryetyenu parutyayu, jiryatuchu sisa Jüdenü variy saju;

varityi sajchanay, samurray jita yichanayadamu Jüdenunijyu variy. ¹⁴Tividye jdivajni jiryetyenu, sama natutyaniy yimuju riy rimyityumiy Jüdenü siityarivay, riryatidye tuchu sisa Jüdenü sanijyu, riryajva sivara nira Jüdenü jtyanijyu. ¹⁵Jiryatiy rityuchu sitenu tuchodamu Jüdenunijyu saju, samisanichara variñi; juuchatiñi, samachotaniy variy mitya sajura. ¹⁶Ramuni jiryatuchu vijyomujache jiryeyjura jiryeyjuuchu-veda, jiryatuchu sisa Jüdenü variy jiyadajuntiy, jiryatidye misasiy. Sanachotiy sunuy Jüdenü samiryá, nini sumtya, jaryi vanurya daryajura satuchoda sanijyu jdivajni, varityi sajiriryi tuchoda Jüdenü Jnutu jtedamuju. ¹⁷Savichanuyada Ediyasibe Jüdenuju tuchu, nutyu vuy savichanuyada nijyami. Nini jachiñuyada siva Jüdenü samiryunda, rañumajmu. Ne ruboda variy mumuri vaatasaraju, tiquinijyate jarimyuni ranchajuntiy. Ne ruboda variy mucadiva. ¹⁸Jadchiy jita satuchoda variy Jüdenüjsantiy, sajachiñuyada variryá rumura, ruboda jita variy, ratidye javve nutasarajo variy.

¹⁹⁻²⁰Ratyeryiveda, titiy caray jiryetyenu sitenu nütasasiy, sataryataniñi jityenu variy sacarajyomusintiy, saray jita variy sayada, sabayanu diiyadajisiy, saramityaniy varintyirya sajuuchovedajuuntiy.

Jasiñuma rabaryi.

*Sayanuma
Santiyácu*